

**Marius Boyer**

**Quouro lou Franc  
valié vint sòu**



**C.I.E.L. d'Oc**

Centre International de l'Écrit en Langue d'Oc  
3 Place Joffre, 13130 Berre L'Étang

Coume tout ço qu'es esta sa batudo, Bougneto l'a, eici, perseguido emé soun gâubi e soun amour.

La seguido de si memòri — car souto lou vèsti de raconte es en majo partido d'acò que s'agis — n'es encaro un cop la meïouro provo. Longo-mai nous la porge!

Jan GAVOT,  
Majourau dóu Felibrige.

## MA PROUMIERO MESTRESSO

### Proumiero epoco

Oh! moun escolo n'èro enca que la maternalo. Sabès aquelo cavo óurriblo que vous óublijo de nous separa de nouèstei maire. Que de plour, que de lagremo, dins nouèstei uei d'enfant!

Aquélei proumiéreis ouro de l'enfanço soun inoublidablo e soun souveni es toujou vivènt en iéu: Aviéu uno raubo, de moun tèms lei garçoun pourtavon encaro long-tèms “la raubeto” que, pus tard, après la maternalo serié remplaçado pèr la blodo negro d'escoulan.

Avian panca de tablèu negro, ni de croio blanco. Aquelo escolo aurian pouscu la nouma “gardarié d'enfant”, mai acò, li fa pas rèn. Pèr nautre aquelo maternalo èro l'Escolo.

Nouesto direitriço avié un biais bèn persounau de guida nouèstei proumié pas d'escoulan. Bèn segu, nous fasié canta, nous racountavo d'istòri. Mai nous proumetié de longo de proumenado “quouro lou céu serié blu”, disié. Sènso doute que lou céu èro pas proun blu pèr elo, qu'ai jamai fa de proumenado.

Mi souveni d'uno cavo que s'es debanado mai d'un còup. Pèr un bel après-dina, alor que lou soulèu picavo fouart, nous diguè d'uno vouas sentencioso:

— Meis enfant, vuei, coumo lou soulèu nous expandisse sa calourasso, anan faire un eïsercice; vau barra leis èstro e anan dourmi cadun à nouèstei plaço.